



列傳第十九

金史八十一

元開府儀同三司上柱國前中書右丞相監修國史

都總裁臣脫脫修

鵠謀琶

迪姑迭

阿徒罕

夾谷謝奴

阿勒根沒都魯

黃搆敵古本

蒲察胡盞

夾谷吾里補

王伯龍

高彪

溫迪罕蒲里持

伯德特里補

耶律懷義

蕭王家奴

田灝

趙威

鵠謀琶木吉水斜卯部人也性忠直寬厚重節義勇

塢塔城

於戰父阿鶻土贈金吾衛上將軍穆宗時鶻謀琶內
附先遣子寧吉從間道送款遂使活里曠與鶻謀琶
合軍攻降諸部因領其眾與弟胡麻谷渾坦姪阿里
等攻下諸城從撒改破塢塔城穆宗屢賞之破高麗
戍兵與石適歡討平諸部蒲察部雅里孛董與其兄
弟胡八雙括等欲叛歸遼鶻謀琶執之送于康宗賜
賚甚厚破高麗曷懶甸及下陲魯城有功天輔六年
卒年七十二天眷中贈銀青光祿大夫

迪姑迭温迪罕部人祖扎古廼父阿胡迭世為胡論
水部長迪姑迭年二十餘代領父謀克攻寧江州敗

陲魯城

遼援兵獲甲馬財物攻破奚營回至韓州遇敵二千
人擊走之幹魯古與遼人戰于咸州兵已却迪姑迭
以本部兵力戰諸軍復振遂大破之護步谷岡之役
乙里補字董陷敵中迪姑迭援出之攻黃龍府身被
數創授猛安天輔七年從上至山西病卒年四十七
天眷中贈光祿大夫

阿徒罕温迪罕部人年十七從撒改幹帶等討平諸
部皆身先力戰高麗築九城于曷懶甸幹塞禦之阿
徒罕為前鋒高麗有屯于海島者阿徒罕率眾三十
人夜渡焚其營柵戰艦大破之遂下馳吉城既而八

馳吉城

五棍水

城皆下功最遠兵自寧江州東門出阿徒罕逆擊盡殪之以功授謀克從攻黃龍府力戰身被數十創竟登其城後與烏論石準援照散城阿徒罕請乘不備急擊之遂夜過益棍水詰朝大敗之幹魯上其功賜幣與馬天輔四年五月疾病賜良馬一匹詔曰汝安則乘之年六十五卒上悼惜之遣使弔祭以馬為贈阿徒罕為人孝弟好施惠健捷善弋獵至角觝擊鞠咸精其能

夾谷謝奴隆州納魯悔河人也國初祖阿海率所部來歸獻器用甲仗父不剌速襲本部勃董從太祖伐

悔河

遼授世襲猛安親管謀克為曷懶路都統謝奴其長子也長身多髯善騎射通女直契丹大小字及漢字既冠首一父見太祖命佩金牌總領左翼護衛西京未下謝奴獲城中生口乃知城中潛遣人求救於外都統府得為之備却其救兵西京乃下自燕京還過判泥恩納阿遇敵於隘謝奴身先士卒射殺敵中先鋒二人敵潰走總管蒲魯虎以甲及馬贈之後領其父猛安從攻和尚原出仙人關宋兵據險猛安雖訛只突戰不克謝奴選麾下五十人戰克之與吳玠相拒烏里雅行陣不整吳玠乘之謝奴領兵逆戰遂大

黑河

渾河

破敵計前後功襲其父猛安謀克宗弼復取河南陝西宋人欲潛兵襲取石閭諸營謝奴自渭南大禹鎮掩其伏兵射中其軍帥宋兵敗走多獲旗幟兵仗帥府厚賞之除華州防禦使入為工部侍郎遷本部尚書改平涼尹昭義軍節度使大定初卒

阿勒根沒都魯上京納鄰河人也後徙咸平路梅黑河雄偉美鬚髯勇毅善射國初伐遼沒都魯在軍中領謀克猛安每遇敵往來馳突人莫敢當故所戰皆克皇統元年計功擢宣威將軍明年授同知通遠軍節度使改移刺都紇詳穩授世襲本路寧打渾河謀

星顯水

自城

克為滑州刺史改肇州防禦使蒲與路節度使遷驃騎上將軍是歲以年老致仕卒累官金吾衛上將軍年七十三

黃搆敵古本世居星顯水從破寧江取咸州平東京路及諸山寨柵皆有功從麻吉破遼將和尚節使兵七千於上京復破那野軍二萬再從麻吉遇敵於阿鄰甸麻吉被創不能戰敵古本率兵擊敗之勦殺殆盡從攻回鶻城破其兵九萬敗木匠直撒兵於山後俘獲甚衆敗昭古牙之兵三千獲其家屬而還攻平州張覺吾春被圍於西山敵古本引兵救之解其圍

并獲糧五千斛招降戶口甚衆從平輿中撫安其民人天會間大軍伐宋敵古本從取濬開德大名及取濟南高唐棣密等州皇統間以功襲謀克移屯於壽光縣界為千戶六年授世襲千戶隸州防禦使卒蒲察胡盩案出許水人年十八從軍其父特斲死襲為謀克天輔間夏以兵三萬出天德路胡盩從婁室迎戰以兵三百敗敵二千天會三年大軍攻太原城中出兵萬餘來戰胡盩以所領千戶軍擊之復敗敵兵三萬餘於榆次境六年從婁室攻京兆以所部兵屢與宋人接戰皆先登有功七年取邠州遇宋人二

渾河

十餘萬我軍右翼少却時胡盩為左翼千戶摧鋒陷陣敵遂敗去敗張浚富平復有功十三年擊關師古於臨洮衆三萬餘從攻涇州從破德順秦鞏臨洮河蘭等州破吳璘兵胡盩皆有力焉授德順州刺史改隴州防禦使鳳翔尹卒年五十五

虎城遼水

夾谷吾里補暗土渾河人徙天德父兀屯討烏春窩謀罕有功吾里補隸婁室帳下攻係遼女直招降太彛照三等從婁室救幹魯古于威州敗遼兵于押魯虎城遼軍營遼水吾里補五謀克軍乘夜擊之遼軍驚潰殺獲幾盡幹魯伐高永昌吾里補以數騎奮擊

于遼水之上復以四十騎伏于津要遇其候騎擊之獲生口因盡知永昌虛實太祖嘉之賞奴婢八人永昌駐軍於兔兒陀先據津要軍不得渡吾里補與撒八射殺其先鋒二人永昌衆稍却大軍遂渡遼水及攻廣寧軍帥選勇士先登吾里補與赤盞忽沒渾各領所部突入其陣大軍繼之遂拔廣寧太祖攻臨潢吾里補面被重創奮擊自若賞以遼宮女二人遼主杲已取中京吾里補以四十騎覘敵獲遼喉舌人因知遼主所在後從都統幹魯定雲中從宗翰屯應州遼軍在近境吾里補以所部擊敗之宗望伐宋宋安

撫使蔡靖詣吾里補降婁室攻陝西諸郡往往復叛吾里補攻敗之敗張浚軍于富平吾里補先登睿宗賞以金器名馬遂以先鋒攻蘭州下其城加昭武大將軍授世襲猛安累官字持本部族節度使以老致仕封芮國公吾里補多智略膂力過人雖甚老勇健不少衰大定初劇賊嘯聚出持鄙關吾里補率鄉里年少逆擊之賊黨遂潰事聞賞賚甚厚大定二十六年卒一百有五歲

王伯龍潘州雙城人也遼末聚黨為盜天輔二年率衆二萬及其輜重來降授世襲猛安知銀州兼知雙

鄙關

雙城

白河

州三年太祖攻臨潢伯龍與韓慶和以兵護糧餉輓夫千五百人皆授甲慶和已將兵行前伯龍從糧居後遇遼兵五千餘邀於路伯龍率輓夫擊敗之獲馬五百匹四年從攻下中京并克境內諸山寨為靜江軍節度留後五年真授節度使從宗望討張覺於平州伯龍先登馳擊手殺數十百人遷右金吾衛將軍白河之戰伯龍當其左軍麾兵疾馳蹂之宋軍亂我師乘勝奮擊敗之宗望伐宋伯龍為先鋒次保州遇敵五萬破之招降新樂軍民十餘萬大軍圍汴宋太尉何臬以軍數萬出酸棗門伯龍以本部遮擊多所

斬獲及破汴伯龍以治攻具有功進破孔彥舟鄴瓊衆三萬於洺州是年同知保州兵馬安撫司事將兵數千攻北平拔之復取保州河間睿宗經略山東伯龍從攻青州未下城中夜出兵襲伯龍營伯龍不及甲獨被衣挺刃拒營門敵不得入因奮擊殺數十人已而軍士皆甲出殺傷宋兵不可勝計并獲其一將斬之及下青州第功伯龍第一六年還攻莫州降之加太子少保莫州安撫使破李固寨衆十餘萬於濮州濮城守城中鎔鐵揮我軍攻之不能剋伯龍被重甲首冠大金挺槍先登殺守陴者二十餘人大軍相

濮州
濮城

繼而上遂剋之進攻徐州伯龍復先登充徐宿邳三路軍馬都統敗高托山之衆十五餘萬於清河進擊韓世忠於邳州走之與大軍會於宿遷追世忠至揚州還攻泗州泗州守將以城降屯軍磁陽破陳宏賊衆四十餘萬破黃戩於單州進攻歸德軍帥遣伯龍立攻具伯龍從二十餘騎行視地形城中忽出兵千餘欲生得伯龍伯龍縱騎馳之敵兵亂墮而死者幾二百人破王善之衆於巢縣取廬州和州伯龍之功多軍渡采石擊敗岳飛劉立路尚等兵獲芻糧數百萬計還過真揚道遇鄺瓊韓世忠軍復戰敗之復

為莫州安撫改知澤州太行群賊往往嘯聚伯龍皆平之天眷元年為燕京馬軍都指揮使從元帥府復收河南權武定軍節度使兼本路都統宋兵據許州伯龍擊走之招復其人民是年秋泰安卒徒張貴驅脅良民據險作亂伯龍討平之皇統元年以本部從宗弼南伐攻破濠州而還三年為武定軍節度使改延安尹寧昌軍節度使天德三年改河中尹徙益都尹封廣平郡王卒年六十五正隆間例贈特進定國公

高彪本名召和失辰州渤海人祖安國遼興辰開三

鎮節度使父六哥左承制官至刺史處始生其父用術者言為其時日不利於己欲不舉其母為營護居數歲竟逐之處匿於外家遼人調兵東京時六哥已老當從軍悵然謂所親曰吾兒若在可勝兵矣所親具以實告因代其父行戰於出河店遼兵敗走處獨力戰軍帥見之曰此勇士也令生致之幹魯攻東京六哥率其鄉人迎降以為榆河州千戶久之告老虎代領其眾都統杲攻中京處領謀克從幹魯破遼將合魯燥及韓慶民於高惠之境已而駐軍武安合魯燥以勁兵二萬來襲從幹魯出戰與所部皆去馬先

登奮擊敗之奚人負險拒命所在屯結處屢戰有功宗望攻平州處徇地西北道破敵招降石家山寨再從宗望伐宋為猛安師次真定處率兵士七十人臨城築甬道城中夜出兵焚攻具處擊走之大軍圍汴以五十騎屯於東南水門宋人再以重兵出戰處皆敗之師還屯鎮河朔復破敵於霸州擒其裨將祝昂河間夜出兵二萬襲我營壘處率三謀克兵擊敗之天會五年授靜江軍節度使壽州刺史明年伐宋從帥府徇地山東攻城克敵數被重賞七年師至睢處以所部招誘京西人民次柘縣其官吏出降處獨與

五十餘騎入城繼而城中三千餘人復叛虜率其衆力戰敗之撫安其民而還從梁王宗弼襲康王至杭州師還宋將韓世忠以戰艦數百扼於江北宗弼引而西將至黃天蕩敵舟三十餘來逼南岸其一先至者載兵士二百餘虜度垂及以鈎拽之率勇士數十躍入敵舟所殺甚衆餘皆逼死於水中明年從攻陝西師至寧州虜與宗人昂率兵三千取廓州始至有來降者言城東北隅守兵將謀為內應虜即夜從家奴二人以登左右守者覺之虜與從者皆殊死戰諸軍繼進遂克其城從攻和尚原及仙人關與阿里監

護漕糧并戰艦至亳州宋人以舟五十艘阻河路擊敗之擒其將蕭通擊漣水賊水寨進取漣水軍其官民已遁去悉招降之虜勇健絕人能日行三百里身被重鎧歷險如飛及臨敵身先士卒未嘗反顧大小數十戰率以少擊衆無不勝捷齊國既廢攝滕陽軍以東諸路兵馬都統撫諭徐宿曹單滕陽及其屬邑皆按堵如故為武寧軍節度使頗贖貨嘗坐贓海陵以其勲舊杖而釋之改忻州防禦使歷安化安國武勝軍節度使遷行臺兵部尚書改京兆尹封郃國公以憂去官起復為武定軍節度使歸德尹正隆例授

金紫光祿大夫久之致仕復起為樞密副使舒國公
賜名虎卒年六十七謚桓壯虎性機巧通音律人無
貴賤皆溫顏接之

溫迪罕蒲里特隆州移离閃阿胡勒出寨人也魁梧
美髯有謀略以智勇聞都統杲取中京蒲里特權猛
安領軍五千遇契丹賊萬餘與戰敗之出袞古里道
敗敵八千餘至臘門華道復以伏兵敗敵萬人太祖
定燕自儒州至居庸關執其喉舌人有頃賊三千餘
人復寇臘門華道蒲里特整隊先登賊識其旗幟望
風而遁遂奮擊之親執賊帥皇統元年從梁王宗弼

伐宋留軍唐州敵眾奄至蒲里特擊之大名軍萬四
千號二十萬蒲里特率親管猛安身先士卒衝擊敵
少却乃張左右翼併擊之敵眾散走而別遇兵二萬
來援復以兵三千擊走之時邳州土賊嘯聚幾二十
萬蒲里特軍三千分為數隊急攻之賊潰去南京路
遇敵軍二萬蒲里特以軍三千擊敗之是日有兵自
城中出者復擊敗之皇統二年遷定遠大將軍同知
鳳翔尹六年改京兆尹轉寧州刺史改西北路招討
都監遷永定軍節度使海陵南征改武衛軍都總管
大定三年授開遠軍節度使改泰寧軍卒十九年以

功授其子兀帶武功將軍本猛安奚出痕世襲謀克伯德特离補奚五王族人也遼御院通進天會初與父撻不也歸朝授世襲謀克後以京兆尹致仕特离補招降松山等州未附軍民及招降平州蘇州境內督之耕作宗望伐宋特离補為軍馬猛安與諸將留規取保遂安三州攻安肅軍河間雄保等兵十餘萬來救特离補率所部先戰大軍繼之大破其兵遂拔安肅特离補攝通判事降將胡愈陰結眾謀亂特离補勒兵擒愈及其眾五十餘人安肅軍改為州就除同知州事改磁州捕獲太行群盜元帥府以磁相二

州屯兵屬之擒王會孫小十苗清等群盜遂平遷濱州刺史廉入優等以母憂去官起復本職改涿州刺史入為工部郎中從張浩營繕東京宮室及田穀黨事起朝省為之一空特离補攝行六部事遷大理卿出為同知東京留守天德三年復為大理卿同知南京留守丁父憂起復沼州防禦使正隆盜起州縣無兵不能禦沼舊有河附于城下特离補乃引水注濠中以為固盜弗能近州賴以安遷崇義軍節度使未幾告老歸田里卒特离補為人孝謹為政簡靜不積財常曰俸祿已足養廉衣食之外何用蓄積凡調官

行李止車一乘婢僕數人而已

耶律懷義本名字迭遼宗室子年二十四以戰功累遷同知點檢司事宗翰已取西京遼主謀奔于夏懷義諫止之不見聽乃竊取遼主廐馬來降太祖自燕還師留宗翰魯經略西方懷義領謀克從軍天會初帥府以新降諸部大小遠近不一令懷義易置之承制以為西南路招討使乃擇諸部衝要之地建城市通商賈諸部兵革之餘人多匱乏自是衣食歲滋畜牧蕃息矣從宗翰伐宋降馬邑破鴈門屯兵進攻太原以所部別降清源縣徐溝鎮遂與諸將別屯汾

州之境時河東陝西路兵來救太原劉光世折可求柵于文水西山懷義捕得生口盡知宋兵屯守要害乃分兵襲敗之明年再伐宋從婁室取汾州及其屬邑遂過平陽出澤潞以趨河陽所至皆降及大軍圍汴懷義屯京西汴城既下宋兵之出奔者邀擊盡之從攻鄭鄧州及討平鄭州叛者攻下濮州及雷澤縣從破大名東平府徐兗等州皆有功七年還鎮十年加尚書左僕射改西北路招討使懷義在西陲幾十年撫御有恩及去老幼遮道攀戀數日不得發天眷初為太原尹治有能聲改中京留守從宗弼過烏納

元河

水還中京以老乞致仕不許改大名尹命不赴治所止以俸廉給之每歲春水扈從餘聽自便明年再請老得謝給俸廉之半海陵即位封漆水郡王進封莘王久之進封蕭王正隆例封景國公其子神都幹為西北路招討都監迎侍之官神都幹從海陵南征懷義卒于雲中年八十二

蕭王家奴奚人也居庫党河為人魁偉多力未冠仕遼為太子率府率天輔七年都統杲定奚地王家奴率其鄉人來降命為千戶領之奚王回鹘保既死其親黨金臣阿古者猶保撒葛山王家奴與突撚往討

之生擒金臣阿古者降其餘衆時平瀛多盜王家奴以所部屢破賊兵斬馘執俘數被賞賚宗望伐宋敗郭藥師於白河亦與有功至河上宋兵扼津要與諸將擊敗之進圍汴破其東門兵明年再伐宋宗望軍至中山諸門分兵出戰焚我攻具祈州河間各以兵來援皆敗之師還屯鎮河朔濱州賊葛進聚衆數萬臨淄李董照里以騎兵二千討之王家奴領謀克先登力戰大破其衆明年攻滄州宋兵拒戰復從照里擊走之宋將徐文以舟百艘泊海島即以商船十八進襲斬首七百級獲舟二十天會八年除靜江軍節

度使授世襲千戶從梁王宗弼征伐為萬戶還為五
院部節度使天德二年改烏古迪烈招討都監卒
田灝字默之興中人遼天慶八年進士歷官金部員
外郎權歸德節度使太祖定燕灝舉四州版圖歸朝
加都官郎中權節度使事四遷知真定府事招降齊
博游貴等賊眾五千餘人已而貴復叛去灝遣齊博
偽叛從貴因令伺間殺之降其眾賊壘悉平三遷行
臺左丞彰德軍節度使是時新定力役灝蠲籍之半
而上之故相之繇賦比他州獨輕徙同知河北東路
都總管改同簽燕京留守司事民遮留不得出易服

夜去改河東南路轉運使尋改絳陽軍節度使居三
年以疾請謝事徑解印歸數奏不允移鎮振武軍入
為刑部尚書居三月請老卒于家

趙臧字德固遼陽人其婦翁以優伶得倖於遼主臧
補閣門祗候累遷太子左衛率後居灤州宗望討張
覺臧踰城出降授洛苑副使為灤州千戶遷洛苑使
檢校工部尚書從伐宋至汴遷隸州刺史侍衛步軍
都虞候及再伐宋攻真定與有功改商州刺史檢校
尚書右僕射五年同知信德府路統押軍兵兼沿邊
安撫司事明年權知濟州事八年從定河南授隴州

團練使十年改知石州賊久在兵間不善治民坐謗
議謫監平州甜水鹽齊國廢河南皆以宿將守之授
賊宿州防禦使統本路軍兵賊重義接儒士嘗以事
至汴有故人子負官錢百萬賊以橐金贈之其子悉
為私費復代輸之項之有訟徐帥不法者朝廷使賊
鞫治賊委曲營護坐是廢罷寓居於燕海陵出領行
臺省至燕賊往見之因訴其事及海陵即位起為保
大軍節度使貞元初改內省使未幾為中都路都轉
運使明年再徙順義興平入為太子詹事鎮沁南以
疾卒年六十六後十餘年賊子孫司徒張通古子孫

皆不肖淫蕩破貲產賣田宅世宗聞之詔曰自今官
民祖先亡沒子孫不得分割居第止以嫡幼主之母
致鬻賣仍著于令

列傳第十九

列傳第二十

金史八十二

元開府儀同三司上柱國前中書右丞相監修國史都總裁臣脫脫修

郭藥師

子安國

耶律塗山

烏延胡里改

烏延吾里補

蕭恭

完顏習不主

紇石烈胡刺

耶律恕

郭企忠

烏孫訛論

顏蓋門都

僕散渾垣

鄭建充

烏古論合三

移刺温

蕭仲恭

子拱

蕭仲宣

高松

海陵諸子

光英 元壽 矧思阿補 廣陽

郭藥師渤海鐵州人也遼國募遼東人為兵使報怨于女直號曰怨軍藥師為其渠帥幹魯古攻顯州敗藥師于城下遼帝亡保天德耶律捏里自立改怨軍為常勝軍擢藥師諸衛上將軍捏里死其妻蕭妃稱制藥師以涿易二州歸于宋藥師以宋兵六千人奄至燕京甄五臣以五千人奪迎春門皆入城蕭妃令閉城門與宋兵巷戰藥師大敗失馬步走踰城以免宋人猶厚賞之太祖割燕山六州與宋人宋使藥師副王安中守燕山及安中不能庇張覺而殺之函其

首以與宗望藥師深尤宋人而無自固之志矣宗望軍至三河藥師等拒戰于白河兵敗藥師乃降宗望遂取燕山太宗以藥師為燕京留守給以金牌賜姓完顏氏從宗望伐宋凡宋事虛實藥師盡知之宗望能以懸軍深入駐兵汴城下約質納幣割地全勝以歸者藥師能測宋人之情中其肯綮故也及兩鎮不受約束命諸將討之藥師破順安軍營殺三千餘人海陵即位詔賜諸姓者皆復本姓故藥師子安國仍姓郭氏

郭安國藥師子也累遷奉國上將軍南京副留守貞

元三年南京大內火海陵使右司郎中梁鈇同知安武軍節度事王金按問失火狀留守馮長寧都轉運使左瀛各杖一百除名安國及留守判官大良順各杖八十削三官火起處勾當官南京兵馬都指揮使吳濬杖一百五十除名失火位押宿兵吏十三人並斬諭之曰朕非以宮闕壯麗也自即位以來欲巡省河南汝等不知防慎致外方姦細燒延殆盡本欲處爾等死罪特以舊人寬貸之押宿人兵法當處死疑此輩容隱姦細故皆斬也安國性輕躁本無方略海陵將伐宋以安國將家子擢拜兵部尚書改刑部尚

書軍興領武捷軍都總管與武勝武平軍為前鋒海陵授諸將方略安國前奏曰趙構聞王師至其勢必逃竄臣等不以遠近追之獲而後已但置之何地海陵大喜曰卿言是也得構即置之寺觀嚴兵守之及聞世宗即位海陵謀北還更置浙西道兵馬都統制府以完顏元宜為都統安國副之及海陵遇弒衆惡安國所為與李通輩皆殺之

贊曰郭藥師者遼之餘孽宋之厲階金之功臣也以一臣之身而為三國之禍福如是其不侔也魏公叔座勸其君殺衛鞅豈無所見歟

顯水

耶律塗山系出遙輦氏在遼世為顯族塗山仕至金
吾衛大將軍遙里相溫遼帝奔天德塗山以所部降
宗翰承制授尚書為西北路招討使宗翰伐宋塗山
率本部為先鋒至汾州遇宋將折家軍請濟師併力
破之從攻太原隆德府從入汴克洛陽及從婁室平
陝右天會七年授太子少保十年遷尚書左僕射致
仕卒年九十一正隆例贈持進部國公

烏延胡里改曷懶路星顯水人也後授愛也窟謀克
因家焉從閣母圍平州有功及伐宋圍汴五謀克與
宋兵萬人遇于城南胡里改先馳擊敗之元帥府遂

賞良馬一匹五年攻宗城縣敵棄城走恩州胡里改
追殺千餘人獲車四百兩帥府賞牛三十頭馬一匹
七年討泰山群盜平之毀其營柵兗州群寇三千餘
保據山險胡里改復破之賞牛二十二頭馬四匹八
年攻廬州至柘臯鎮胡里改領甲士三十為前鋒執
宋所遣持書與劉四廂錡者七人復以先鋒軍攻和
州北至舍山縣五里獲甲士二人乃知宋三將將兵
且至胡里改伏其軍遂獲姚觀察帥府賞馬二匹九
年定陝右胡里改以所部遇敵千人敗之生擒甲士
一人盡得敵之虛實又從蒲魯渾徇地熙秦敗敵兵

二千於秦州賞馬一匹宋人屯襄陽府監軍按補遣胡里改領四猛安往攻之宋兵三千已渡江方營壁壘乘其未就突戰破之梁王宗弼復河南將攻陳州遣胡里改以甲士三十捕偵候人至蔡州西遇兵八十餘戰敗之獲南頓縣令及攻陳州夜將四更忽聞敵開門潰走胡里改亟領二謀克軍追及之而猛安突葛速亦領軍繼至大敗之皇統二年遷定遠大將軍八年授臨洮少尹兼熙秦路兵馬副都總管九年改同知京兆尹兼本路兵馬都總管天德改同知平陽尹兼河東南路兵馬都總管貞元三年改同知曷

路禪嶺

懶路總管大定四年授胡里改節度使七年改歸順軍節度使十年移鎮顯德卒官年六十九十九年詔授其子五十六武功將軍世襲本路婆朮火河謀克烏延吾里補曷懶路禪嶺人也徙大名路天會中從其父達吉補隸元帥右監軍麾下撻懶以事赴闕以達吉補自隨吾里補領其父謀克從大軍攻滄州方夷濠隍城中兵來拒吾里補以本部擊却之王師下青州力戰有功獲馬百匹以獻降獲賊黨甚衆青州戍將覲吉補以萊州兵衆請濟於帥府吾里補將十二謀克兵往救之遂降其四營拔其一營得戶四千

又敗賊兵五萬于恩州攻破其營降戶五萬獲牛畜
萬餘將至臨清縣遇敵兵三千又敗之俘獲甚衆生
擒賊首以獻帥府嘉其功以奴婢百牛三十賞之時
覲吉補敗于恩州之境吾里補復以兵四千往救之
破敵萬餘宋兵十萬在單父間總管宗室移刺屋選
步卒一萬騎兵四千往討之吾里補領其親管謀克
以從遇敵先登力戰有功大軍經略密州吾里補將
兵二千為前鋒遇敵萬人于高密遂敗其衆追至城
下殺戮殆盡獲馬牛三千餘吾里補與孛太欲敗賊
王義軍十餘萬于州南是夜賊兵數千來襲營吾里

補以兵橫擊走之後從大軍攻楚揚通泰等州天眷
二年襲其父世襲猛安授寧遠大將軍皇統七年益
以親管謀克天德三年除同知歸德尹正隆初為唐
古部族節度使大定二年為保大軍節度使是歲改
鎮通遠是時宋軍十萬餘入阿隴據險要攻郡邑元
帥左都監合喜奏益兵詔益兵七千遣吾里補與彰
化軍節度使宗室璋等七人偕往以備任使進階龍
虎衛上將軍卒于軍中

蕭恭字敬之乃烈奚王之後也父翊天輔間歸朝從
攻興中遂以為興中尹師還以恭為質子宗望伐宋

翊當領建興成川懿五州兵為萬戶軍帥以恭材勇使代其父行時年二十三至中山宋兵出戰恭先以所部擊敗之經山東及渡淮襲康王皆在軍中師還帥府承制授德州防禦使奚人之屯濱棣間者皆隸焉改棣州防禦使皇統間改同知橫海軍節度使丁父憂起復為太原少尹用廉遷同知中京留守事累遷兵部侍郎授世襲謀克坐問禁中起居狀決杖奪一官貞元二年為同知大興尹歲餘遷兵部尚書為宋國生日使以母憂去官起復為侍衛親軍馬步軍都指揮使四年遷光祿大夫復為兵部尚書是歲經

畫夏國邊界還過臨潼失所佩金牌至太原憂恚成疾時已具其事驛聞於朝海陵復命給之仍遣諭恭曰汝失信牌亦猶不謹朕方俟汝欲有委使乃稱疾耶必以去日身佩信牌歸則無以為辭欲朕先知耳使至恭已疾篤稽顙受命俄頃而卒海陵方遣使與其子護衛九哥馳視乃戒府官使善護之至保州已聞訃矣海陵深悼惜之命九哥護喪以還所過州府設奠喪至都命百官致祭親臨奠賻贈甚厚并賜廐馬一謂九哥曰爾父銜命卒於道途甚可悼惜朕乘此馬十年今賜汝父可常控至柩前既葬汝則乘之

完顏習不主年十六從伐宋攻下懷仁縣功居最從
睿宗經略陝西以兵七百人入丹州諸山遇盜三千
擊敗之又破賊四千生擒其將帥出隴州以兵四百
敗敵數千宋兵七千來取鞏州復擊走之又以五千
兵敗吳玠之衆三萬白塔口遇敵五千復敗之別降
定遠等寨皇統二年授同知臨洮尹以憂去官未期
以舊職起復改孟州防禦使遷臨洮尹復以罪罷正
隆三年起為京兆尹改河南尹卒年五十八

紇石烈胡剌晦發川噎敦河人徙西北路議契丹字
為帥府小吏梁王宗弼復陝西久不通問睿宗在燕

京遣胡剌往候之是時宗弼自鳳翔攻和尚原使胡
刺視彼中地形修道築城十二年往濱州密訪南邊
事體及觀劉豫治齊狀盡得其虛實睿宗甚嘉之皇
統初從宗弼渡淮及下廬和二州大破張浚韓世忠
等軍遣胡剌馳奏賞以金盃重綵五端絹五匹七年
授同知景州軍州事以廉加忠武校尉天德初以監
察御史分司行臺歷同知濟州防禦使事入為監察
御史秩滿再任大定二年遷刑部員外郎與御史大
夫白彥敬往西北部族市馬累轉泗州防禦使三遷
蒲與路節度使移寧昌軍卒

耶律恕字忠厚本名耨里遼橫帳秦王之族也為人
謹愿有志喜讀書通契丹大小字與耶律高八來歸
婁室問高八曰與爾同來者誰可任用治軍旅事高
八對曰耨里可婁室與宗翰伐宋恕隸前鋒取和尚
原攻仙人關特為睿宗所知再除太原真定少尹撒
离喝辟署陝西參謀委以軍務遷行臺兵部侍郎再
遷尚書左司郎中海陵為平章政事謂恕曰君亦有
黨乎恕正色曰窮則獨善其身達則兼善天下不以
其道得之非恕之志也何朋黨之有海陵徐曰前言
戲之耳久之為沁南軍節度使遷行臺工部尚書行

臺罷改安國軍節度使為參知政事以疾求解為興
中尹入為太子少保正隆元年致仕封廣平郡王薨
年六十九二年例贈銀青光祿大夫

郭企忠字元弼唐汾陽王子儀之後郭氏自子儀至
承勳皆節鎮北方唐季承勳入于遼子孫繼為天德
軍節度使至昌金降為副使企忠幼孤事母孝謹年
十三居母喪哀毀如成人服除襲父官加左散騎常
侍天輔中大軍至雲中遣耶律坦招撫諸部企中來
降軍帥命同勾當天德軍節度使事徙所部居于韓
州及見太祖問知其家世禮遇優厚以白鷹賜之天

會三年伐宋領西南諸部番漢軍兵為猛安從破鷹門屯兵加桂州管內觀察留後鎮代州明年賊揚麻胡等聚眾數千于五臺企忠與同知州事迪里討平之遷知汾州事是時汾州初下居民多為軍士掠去城邑蕭然企忠詣帥府力請願聽其親舊贖還帥府從之未幾完實如故石州賊閻先生眾數萬至城下僚屬慮有內變請為備企忠曰吾於汾人有德保無他乃率吏民城守會援至合擊破之六年改靜江軍節度留後遷天德軍節度使汴京步軍都指揮使累遷金吾衛上將軍秩滿權沁州刺史到官歲餘卒年

六十八

烏孫訛論善騎射襲父撒改謀克從蒙剗攻東京及廣寧擊北京山賊皆有功蕭霸哲朶攻恩州訛論以六十騎偵之逮夜遇敵數百騎掩擊之生獲三人知霸哲眾九萬且至故蒙剗得以為備遂破霸哲宗望伐宋已至汴訛論破尉氏中牟援兵取其城久之以兵百五十人破敵一千於滄州西明年再伐宋蒙剗戍開州訛論以騎四百守河復敗千餘人斬首七百餘宗弼渡淮阿里先具舟于江上聞王善兵扼其前宗弼使訛論濟師敗王善于河州北李成以兵七萬

千山

據烏江訛論帥二千人直前敗之宗弼遂渡江至江寧十五年沂州竇防禦叛訛論敗之獲竇防禦錄前後功授猛安加昭武大將軍宗弼再取河南訛論以五十騎敗楊家賊五百於徐州東以功受賞不可勝計天德二年除唐州刺史移淄州遷石壘部族節度使行至北京病卒

顏蓋門都隆州帕里千山人也身長美鬚髯天會間從其兄羊艾在軍中方取汴京其兄戰歿遂擐甲代其兄充軍睿宗定陝右以門都為蒲輦隸監軍杲親管萬戶攻饒風關至坊州杲欲與總管蒲魯虎會於

鳳翔遣門都領六十騎先往期會及還備得地形險阨賞銀五十兩其後梁王宗弼駐軍山東遣人詣陝西特召門都至冬齊廢齊及安撫百姓詔書往諭監軍宗室杲門都既還宗弼賞以良馬銀絹事畢復遣從杲天眷初叛將定國軍節度使李世輔偽邀杲至私署以獻甲為名遂以兵劫執而去門都突出以告押軍猛安完顏撻懶同率兵追及首出與戰杲由此得脫以功遷明威將軍復從杲招復陝西進至鳳翔齊國初廢諸路多反覆不一杲授門都牌劄令往撫定門都所至多張甲兵從者安之違者討之帖然無

復叛者杲甚嘉之皇統初遷廣威將軍四年授同知通遠軍節度使事改知保安軍事天德三年為丹州刺史兼知軍事正隆初為寧州刺史大定初宋將吳璘等以軍數十萬人據秦隴元帥府承制以門都為勇烈軍都總管領軍討之宋人保據德順都監合喜遣武威軍副都總管夾谷查刺會宗室璋議征討之策璋與門都曰須都監親至敵必退矣合喜領軍四萬來赴遂復德順州明年秦隴平以功遷金吾衛上將軍授通遠軍節度使五年改慶陽尹兼本路兵馬都總管卒于官十九年錄功以子六哥世襲本路曷

懶兀主猛安敵骨論窟申謀克授武功將軍門都性忠厚謹愨安置營壁尤能慎密有敵忽來雖矢石至前泰然自若廼號令士卒如平時由是人益安附而功易成焉

僕散渾坦蒲與路挾邁人也身長七尺勇健有力善騎射年十六從其父胡沒速征伐初授修武校尉為宗弼扎也天眷二年與宋岳飛相拒渾坦領六十騎深入覘伺至鄆陵敗宋護糧餉軍七百餘人多所俘獲皇統九年除慈州刺史再遷利涉軍節度使授世襲濟州和木海鸞猛安涉里幹設謀克貞元初以憂

去官起復舊職歷泰寧永定軍改成平尹海陵殺渾
坦弟樞密使忽土召渾坦至南京既見沈思久之謂
之曰汝有功舊不因忽土得官以此致罪甚可憐憫
遂釋之改興平軍節度使世宗即位以為廣寧尹窩
斡反為行軍都統與曷懶路總管徒單克寧俱在左
翼敗窩斡於長樂改臨潢尹賊平賜金帛改曷懶路
兵馬都總管徙顯德軍慶陽尹致仕大定十二年上
思舊功起為利涉軍節度使復以金紫光祿大夫致
仕卒年七十二渾坦歷一十七官未嘗為佐貳性沈
厚有識雖未嘗學問明於聽斷所至有治聲云

鄭建充字仲實其先京兆人占籍鄜州仕宋累官知
延安府事天會七年来降仍知延安府屯兵三千宋
劉光烈兵八萬来攻建充相距四十餘日攻益急建
充遣人會斜喝軍夾擊破之俘其裨將賀貴遷節制
司統制軍馬改京兆府路兵馬都監敗宋曲端於彭
原高昌宗據延安為宋守建充擊之盡復城邑復知
延安軍府事齊國建累遷博州團練使知寧州齊國
廢朝廷以地賜宋為宋環慶路經略安撫副使仍知
寧州天眷復取陝西仍以為經略安撫使知慶州從
破甘谷城改平涼尹是時營建南京宮室大發河東

陝西材木浮河而下經砥柱之險筏工多沉溺有司不敢以聞乃誣以逃亡錮其家建充白其事請至砥柱解筏順流散下令善游者下流接出之而錮者得釋正隆軍興括筋角造軍器百姓往往椎牛取之或生拔取其角牛有泣下者建充白其事於朝建充性剛暴常畜獠犬十數奴僕有罪既笞已復噬犬啣之骨肉都盡雖謙遜下士於敵已上一無所屈省部文移有不應法度輒置之坐下或即毀裂由是在位者銜之軍胥李換竊用公帑自度不得免乃誣建充藏甲欲反更再鞫皆無狀方奏上攝事者素與建充有

隙恐其得釋使吏持文書給建充曰朝省有命奈何建充曰惟汝所為是夜死于獄中長子愬亦死焉

烏古論三合曷懶路愛也窟河人後徙真定睿宗為右副元帥聞三合勇略選充扎也後從宗弼征伐補麴院都監未幾從伐宋與宋兵遇於潁州三合先登破之皇統元年領漢軍千戶帥府再以軍四千隸焉除同知鄭州防禦使事再遷太子少詹事大定六年改洺州防禦使上曰卿昔事睿宗積勞苦逮事朕輔佐太子宣力多矣今典名郡所以勞卿也遷永定軍節度使歷臨潢鳳翔尹陝西路統軍使東平尹節制

州郡躬行儉約政先寬簡邊庭久寧人民獲安召為
簽書樞密院事卒十八年世宗追錄三合舊勞授其
子大興河北西路愛也窟河世襲猛安阿里門河謀
克階武功將軍

移刺溫本名阿撒遼橫帳人工契丹小字睿宗為左
副元帥伐宋溫從大臭渡江辟江寧府都巡檢江寧
太平初下宋遣謀人扇構百姓應者數萬人溫擒其
謀者遂不敢竊發宗弼嘉之賜銀千兩重綵百端絹
二百匹宗弼每出征伐未嘗不在行間除同知河北
西路轉運使事會宗弼巡邊溫從軍不之官宗弼入

朝熙宗宴羣臣宗弼欲有奏請已被酒失次溫掖而
出宮明日熙宗謂宗弼曰阿撒事叔甚謹不可去左
右由是宗弼益親信之嘗謂女壻紇石烈志寧曰汝
可効阿撒之為人也可以幾古人矣未幾除同知中
京路都轉運使事累遷左諫議大夫兼修起居注正
隆伐宋以本官為濟州路行軍萬戶從至揚州軍還
除同知宣徽院事世宗御饌不適口召溫嘗之奏曰
味非不美也蓋南北邊事未息聖慮有所在耳上意
遂釋歷永定震武崇義節度使移臨海軍州治近水
秋雨水潦暴至城下城頗決百姓惶駭不知所為溫

瀛水

躬督後夫繕完之雖臨不測無所避僚屬或止温温曰為政疵瀛水泛溢為災守臣之罪當以此身為百姓謝雖死不恨移鎮武定歲旱且蝗温割指以血瀝酒中禱而酹之既而雨露足有羣鴉啄蝗且盡由是歲熟人以為至誠之感云以老致仕卒

贊曰軍旅之事鋒鏑在前不計其死耳屬金鼓目屬旌旗心屬號令此行列之任也自收國用兵至於大定和宋以前用命之士雖細必錄所以明功也

蕭仲恭本名朮里者祖撻不也仕遼為樞密使守司徒封蘭陵郡王父特末為中書令守司空尚主仲恭

性恭謹動有禮節能被甲超橐駝遼故事宗戚子弟別為一班號孩兒班仲恭嘗為班使歷宮使本班詳穩遼帝西奔天德仲恭為護衛大保兼領軍事至霍里底泊大軍奄至倉卒走仲恭母馬乏不能進謂仲恭兄弟曰汝等盡節國家無以我為也仲恭母遼道宗季女也遼主傷之命弟仲宣留侍其母仲恭從而西時大雪寒甚遼主乏食仲恭進衣并進乾糲遼主困仲恭伏冰雪中遼主藉之以憇凡六日乃至天德始得食後與遼主俱獲太宗以仲恭忠於其主特加禮待天會四年仲恭使宋且還宋人意仲恭耶律余

賭皆有亡國之感而余賭為監軍有兵權可誘而用之乃以蠟丸書令仲恭致之余賭使為內應仲恭素忠信無反覆志但恐宋人留不遣遂陽許還見宗望即以蠟丸書獻之宗望察仲恭無他薄罰之於是再舉伐宋執二帝以歸累遷右宣徽使改都點檢宗磐與宗幹爭辯於熙宗前宗磐拔刀向宗幹仲恭呵之乃止既而宗磐以反罪誅仲恭衛禁有備以功加銀青光祿大夫遷尚書右丞皇統初封蘭陵郡王授世襲猛安進拜平章政事同監修國史封濟王詔葬遼豫王於廣寧仲恭請往會葬熙宗義而許之改行臺

左丞相居無何入為尚書右丞相拜太傅領三省事封曹王天德二年封越國王除燕京留守海陵親為書以玉山子賜之是歲薨年六十一謚貞簡正隆例降王爵改儀同三司鄭國公子拱

拱本名迪輦阿不初為蘭子山猛安海陵為宰相徵取人譽薦大臣子以為達官遂以拱為禮部侍郎耶律彌勒拱妻女弟也海陵將納為妃使拱自汴取之還過燕是時仲恭為燕京留守見彌勒身形不類處子竊憂之曰上多猜嫌拱其及禍矣拱去不數日仲恭卒拱至上京聞訃以本官起復佩信牌往燕京治

葬事未行彌勒入宮果如仲恭所相度即遣出宮夜半召拱至禁中詰問無狀海陵終疑之乃罷拱禮部侍郎奪其信牌拱待命踰年不報歸蘭子山治猛安事是時蕭拱張九坐語禁中事得罪拱至蘭子山與客會語及之有阿納與拱有隙乃誣拱言張九無罪被誅語涉怨謗海陵遣使鞠之戒傳者曰此子狂妄宜有此語不然彼中安得知此事使者不復問拱但榜掠其左驗使如告語證之拱遂見殺

仲宣本名野里補仲恭母弟聰敏好學沉厚少言五歲遙授郡刺史累加太子少師為本班詳穩從天祚

西為護衛太保左右班詳穩至石輦鐸遼主留仲宣侍母遂與其母皆見獲太宗嘉之且謂仲宣能知遼國故事命權宣徽使從睿宗伐康王師還家居者久之皇統二年特授鎮國上將軍歷順義永定昭義武寧四鎮節度使為政平易小吏不敢為姦賄賂禁絕奴婢入郡人莫識其面朔潞百姓皆為立祠刻石頌之正隆二年卒六十四

高松本名檀朶澄州析木人年十九從軍為蒲輦有力善戰宗弼聞其名召置左右從破汴京及和尚原累官咸平總管府判官世宗即位充管押東京路渤

海萬戶兵部尚書可喜謀反前同知延安尹李老僧曰我與萬戶高松謀之必從我矣衆曰若得此軍舉事易矣老僧往見松說松曰君有功舊人至今不得大官何也松曰我一縣令也每念聖恩累世不能報尚敢有望乎老僧遂不敢言可喜布輝阿瑣知事不可成遂上變共捕幹論赴有司松從征窩幹以功遷咸平少尹四遷崇義軍節度使卒年七十四

贊曰忠信行已豈不大哉蕭仲恭盡心故主而富貴福澤嚮之與宗室舊臣等矣仲恭廷叱宗磐而朝廷尊高松誼遇李老僧而社稷安皆有古烈丈夫之風

焉

海陵后徒單氏生太子光英元妃大氏生崇王元壽柔妃唐括氏生宿王矧思阿補才人南氏生滕王廣陽

光英本名阿魯補徒單后所生是時燕京轉運使趙襲慶多男故又名曰趙六養于同判太宗正方之家故宗德大夫沈璋妻張氏嘗爲光英保母於是贈璋銀青光祿大夫賜宗正方錢千萬天德四年二月立光英爲皇太子是月安置太祖畫像于武德殿盡召國初嘗從太祖破寧江州有功者得百七十六人並

加宣武將軍賜酒帛其中有忽里罕者解其衣進光
英曰臣今年百歲矣有子十人願太子壽考多男子
與小臣等海陵使光英受其衣海陵即以所服并佩
刀賜忽里罕答其厚意後以英字與鷹隼字聲相近
改鷹坊為馴鷲坊國號有英國又有應國遂改英國
為壽國應國為杞國宋亦改光州為蔣州光山縣為
期思縣光化軍為通化軍云太醫院保全郎李中保
和大夫薛遵義俱以醫藥侍光英李中超換宣武將
軍太子左衛副率薛遵義丁憂起復宣武將軍太子
右衛副率光英襁褓時養于宗正方家其後養于永

寧官及徒單斜也家貞元元年詔朝官京官五品以
下奉引自通天門入居于東宮正隆元年三月二十
七日光英生日宴百官于神龍殿賜京師大酺一日
四年八月光英射鴉獲之海陵大喜命薦原廟賜光
英馬一匹黃金三斤班賜從者有差正隆六年海陵
行幸南京次安肅州光英獲二兔遣使薦于山陵居
數日復獲麋兔從官皆稱賀賜光英名馬弓矢復遣
使薦于山陵六月海陵至南京群臣迎謁海陵與徒
單后光英共載而入海陵嘗言俟太子年十八以天
下付之朕當日遊宴於宮掖苑囿中以自娛樂光英

頗警悟海陵謂侍臣曰上智不學而能中性未有不
由學而成者太子宜擇碩德宿學之士使輔導之庶
知古今防過失詩文小技何必作耶至於騎射之事
亦不可不習恐其懦弱也及將親征后與光英挽衣
號慟海陵亦泣下曰吾行歸矣後誦孝經一日忽謂
人曰經言三千之罪莫大於不孝何為不孝對者曰
今民家子博奕飲酒不養父母皆不孝也光英默然
良久曰此豈足為不孝耶蓋指言海陵弑母事及伐
宋光英居守以阬滿訛里也為太子少師兼河南路
統軍使以衛護之完顏元宜軍變海陵遇害都督府

山窟吐忽河

移文訛里也殺光英于汴京死時年十二後與海陵
俱葬於大房山諸王墓次訛里也咸平路窟吐忽河
人襲其父忽土猛安除邳州刺史三遷昌武軍節度
使歸德尹南京留守河南路統軍使太子少師大定
二年遷元帥右都監宋人陷陳蔡訛里也師久無功
已而兵敗于宋解職俄起為京兆尹世宗謂之曰卿
為河南統軍門多私謁百姓惡之其後經略陳蔡不
惟無功且復致敗以汝舊勞故復用汝京兆地近南
邊宜善理之大定三年卒

元壽天德元年封崇王三年薨

矧思阿補正隆元年四月生小底東勝家保養之賜東勝錢千萬仍為起第五月己酉彌月封其母唐括氏為柔妃賜京師貧者五千人錢人錢二百二年矧思阿補生日海陵與永壽太后及皇后太子光英幸東勝家三年正月五日矧思阿補薨海陵殺太醫副使謝友正醫者安宗義及其乳母杖東勝一百除名明日追封矧思阿補為宿王葬大房山諫議大夫楊伯雄入直禁中因與同直者相語伯雄曰宿王之死蓋養于宫外供護雖謹不若父母膝下豈國家風俗素尚如此或以此言告海陵海陵大怒謂伯雄曰爾

臣子也君父所為豈得言風俗宮禁中事豈爾當言朕或體中不佳間不視朝祇是少得人幾拜耳而庶事皆奏決便殿縱有死刑不即論決蓋使囚者得緩其死至於除授宣勅雖復稽緩有何利害朕每嘗間暇頗閱教坊聲樂聊以自娛書云內作色荒外作禽荒酣酒嗜音峻宇雕墻有一於此未或不亡此戒人君不恤國事溺於此者耳如我雖使聲樂喧動天地宰相敢有濫與人官而吏敢有受賂者乎外間敢有竊議者乎爾諫官也有可言之事當公言之言而不從朕之非也而乃私議可乎伯雄對曰陛下至德明

聖固無竊議者愚臣失言罪當萬死惟陛下哀憐海陵曰本欲殺汝今祗杖汝二百既決杖至四十使近臣傳詔諭伯雄曰以爾藩邸有舊今特釋之

滕王廣陽母南氏本大臬家婢隨元妃大氏入宮海陵幸之及有娠即命為殿直正隆二年九月二十六日生廣陽十月滿月海陵分施在京貧民凡用錢千貫三年二月封南氏為才人七月封廣陽為滕王九月薨

贊曰海陵伐宋光英居守使陲滿訛里也以官師兼統軍之任計至悉也豈料死其手乎荀首有言不以

人子吾子其可得耶海陵睨人之子不翅魚肉而獨已子之謀安不可得矣



